

四庫全書

集部

欽定四庫全書

集部

鹿洲初集卷十二

詳校官左中允_臣瑯五珠

助教_臣常循覆勘

總校官進士_臣繆琪

校對官修撰_臣戴衢亨

謄錄監生_臣張鴻仁

欽定四庫全書

鹿洲初集卷十二

廣州府知府藍鼎元撰

說

福建全省總圖說

宇內東南諸省皆濱海形勢之雄以閩為最上撐江浙
下控百粵西踞萬山東拊諸夷固中原一大屏翰也自
浙入閩以仙霞關為孔道由浦城泛舟下建寧過延平

抵福州水口皆崇山狹流亂石布水面急灘險絕篙師
失手鐵船亦碎自浙東海岸温州入閩由福寧州寧德
羅源連江至省城皆羊腸鳥道盤紆陡峻日行高嶺雲
霧中登天入淵上下循環古稱蜀道無以過也自江西
入閩一由河口踰崇安過武夷山下泛建陽會于建寧
一由五虎杉關踰光澤下邵武過順昌會于延平一由
瑞金踰汀州泛清流下九龍灘如高屋建瓴從山巔跌
船下幽谷奇險甲於天下其欲避九龍灘則走將樂與

建邵二溪相類皆會延平由汀州陸路至漳州必經上杭永定巔高徑危與福寧道上相彷彿可由漳州同安泉州興化抵省城自廣東入閩由分水關過詔安漳浦從漳州興化一路直達省城雖不通河棹又有坡巔弗利輪轅然閩地坦夷僅此途千里而已其廣東又有小路由三河大埔踰石上入上杭水淺舟小滿載不過三四人鞠躬極足行者苦之然經連城踰小淘順流下延平徑達省城仕宦商旅多由焉自海入閩則上起烽火

門下訖南澳中間閩安海壇金門廈門銅山無處不可
入也全閩九郡一州以福州為省城興泉漳在其南為
下四府福寧州在其東北皆濱於海汀州在其西延建
邵在其北為上四府皆處深山臺灣一府又在大海千
里中全省東南之保障也山則高峰萬疊俯泰岱若培
塿溪則自闢源泉不肯受鄰省涓滴而汀州餘流尚以
分潤潮粵是以其人亦剛方倔强好大喜功蓋山川之
氣然耳大海汪洋萬里無際江浙登萊關東天津視若

戶庭琉球呂宋蘇祿噶囉吧暹羅安南諸番若兒孫環
繞膝下氣象雄壯非他省所可比倫山多田少農圃不
足於供則造物難平之缺憾也所賴舟航及遠逐末者
衆邇日南洋禁開海外諸島稍資內地倘臺灣歲歲豐
熟則泉漳民食亦可無虞是臺灣一郡不但為海邦之
藩籬且為邊民之厰倉經理莫安使民番長有樂利九
州郡咸蒙其福矣沿海要地防維周密提鎮協營重兵
匝布但人人皆實心為國亦不必更為區畫也

貴州全省總圖說

黔為邦居天下之西南據荆楚上游為全滇門戶羊腸
一線東西千里有奇朔南不過三之一輿圖似蜂而小
腰當中原一大郡爾貴陽為省會之區平越一帶則黔
中腹裏往來咽喉之地安順半壁鎖鑰滇南都勻一隅
襟帶西粵思南石阡威寧與巴蜀犬牙相錯黎平鎮遠
思州銅仁接連荆楚沅靖閒蓋四省之屏藩百蠻之控
阨箐崖僻壤屹然與十五國分封並峙何其壯也若稽

形勢銅巖漣溪阻其東赤虺蟒山踞其西盤江關嶺控
其南西望烏江限其北懸車束馬碎踝穿蹄蜀道之難
無以加焉顧山皆崇岡疊嶂如萬夫林立無挺拔羣倫
類五嶽四鎮之槩者水皆懸崖穴地橫恣詰曲如龍蛇
狹處僅容獨木舟而深或至十數丈其山川奇險則有
餘而正大寬舒之氣則不足造物所限固亦無如何矣
聞昔人建議欲以湖南川東益此版圖在楚蜀不見少
在黔省式廓而大若然則東割靖沅北割遵義南割泗

城此為哀多益寡有心經世者最善之規畫第靖沅去
長沙雖遠距貴陽亦不甚近尚在乎可有可無之間若
遵義泗城宜通宜變則有確乎其不可易者遵義去成
都二千餘里距貴陽止百餘里泗城去桂林千餘里距
貴陽止二百里長鞭無及腹之技卧榻有他人之雜彼
此事權均非利便則何如截長補短使各易撫御之為
得也然此第就黔言黔若統中原而論之短長無非臂
指大小總一封域今宇宙恬熙民苗安堵無伏莽乘墉

之慮披輿圖而思保人畱心於地瘠民貧焉可也

貴陽府圖說

府建貴山之南故名貴陽山在城以北二里蜀道所經俗謂之貴人峯環府皆山參差崒靡有正大雄厚作鎮於近其東二里為銅鼓山常有聲相傳諸葛武侯平蠻時藏銅鼓於巖未敢信西里許為獅子山明傅友德屯兵將臺故址在焉南二里為高連輿城東六十里之石門皆竦拔自古著名者唐地里志牂牁有高連石門

二山即此其他崇岡沓嶽難悉數密箐懸崖處處險隘
所謂一夫荷戟萬人趑趄不誣也其大川最著者曰
烏江次為清水江烏江源出水西流經大定黔西入修
文縣繞府北二百里湍流洶悍厥岸有烏江關西境恃
以為固清水江在郡東北百二十里水清深兩崖壁立
嶮崎難行乖西巴鄉諸部負險為梗明景泰中南和侯
方瑛刻為坦途苗獠由是奪氣牂牁江自漢著名源出
府南四十里流經定番州入廣西泗城界府北有水自

夷箐遠來入城中曰貫城河下流入於南明河南明源
出定番流經郡城下富河濟番諸小水皆入焉北流合
烏江入蜀府西北百二十里有陸廣河當水西驛道明
末安邦彥竊踞總督朱燮元駐師破賊處也府屬州縣
以貴筑縣為附郭龍里貴定在其東修文在其北定番
州雄踞於南元人所謂八番歷歷可指西南為廣順州
東北為開州獨府西止三十里即屬他境未免稍蹙然
絕長補短方三百里縣四州三星羅棊布巍然為十一府

領袖亦足稱雄藩矣覽此山川念我民夷深有望於經理者

漳州府圖說

漳於閩地為極南負山臨海介閩廣之衝控引番禺襟
喉嶺表唐總章間王鈐衛將軍陳元光平崖山寇及諸
蠻開屯漳水之北疏請建州漳州之名自此始開元四
年光子珣以地多瘴癘徙州治於李澳川即今漳浦縣
治德宗中徙龍溪乃為今漳州府南界潮州北接延平
延袤八百里西距汀州地東連泉州入海亦五百餘里

在海者倍焉屬邑有十附郭曰龍溪直南百里屏梁山
九十九峰環鹿溪九十九曲者為漳浦東南五十里扼
溪海之吭者為海澄西四十里當郡右翼者為南靖東
北三十七里當郡城左輔者為長泰又西三百一十里
為龍巖西北三百二十里為漳平西南二百有五里為
平和極北四百里介巖平之間者為寧洋四邑皆在萬
山中極南二百五十里為詔安則境連百粵矣其山則
有九龍天寶梁山竈山太武大帽歐寮良岡天宮天柱

九仙碧靈大峰九牙九侯金鳳之屬不可悉數其川之入海者十有一附郡曰西溪北溪西溪自平和南靖合流蜿蜒繞郡治出鎮門為福河與北溪會北溪源出汀界合寧洋龍巖漳平之水下華峰注漫潭併長泰南出柳營江與西溪合為三叉河遂東為錦江中浮二洲間之支為三港其洲曰許茂曰烏礁其夾以許茂烏礁者為中港烏礁之南夾以石碼海澄者為南港許茂之北夾以玉洲者為北港經白石青礁石美東與中南二

港合納南溪浮宮之水入于海南溪在郡南四十里合漳浦巖前溪南靖馬坪之水出橫口過龍井至浮宮入于海是三溪合流其出皆廈門也漳浦鹿溪合平和五寨南靖龍嶺崎溪之水繞邑城而東過舊鎮入于海其出則陸鰲也自西林出者為西林溪合平和河上之流南過雲霄鎮納梁山以南諸水入于海即古所謂漳江其出則銅山也浦邑之東有江曰鴻儒納臺山佛潭橋之水出井尾白石入於海其出則鎮海也平和之水其

自西出者曰河頭溪南流合蘆溪由赤石巖出三河壩
從潮州入海其自南出者曰徐坑溪雙溪會于大溪過
詔安為東溪入海詔安走馬溪出五都由銅山大京門
入海大陂溪繞梅洲經漸山由懸鐘北港門入海港頭
溪經平寨至象頭入海其海中島嶼可名者四十有奇
在海澄者曰浯嶼曰丹霞曰荊曰梁曰嵩曰長曰圭在
漳浦者曰竹塢曰魚腸曰石城曰將軍曰大桑小桑曰
大澈小澈曰鴻儒曰連集曰東鎮南鎮曰橫曰菜曰雙

洲門曰烏石平山大甘山小甘山曰東門嶼曰鐵釘嶼
曰雞心曰五嶼在詔安者曰虎仔曰南村曰犬眠曰崎
曰內外嶼曰七洲嶼七洲者蛤洲獵洲敏洲紅洲卧崗
洲陳洲蛟洲也又有黃芒山青嶼蠟嶼洋嶼則在詔屬
南澳者也其屹然于大海之間為東南巨鎮者自廈門
而下則有鎮海陸鰲古雷銅山懸鐘下迄南澳周環羅
列而藩籬固焉大抵漳州之地大山大海幅員雄壯士
敦氣節女尚貞烈被服于禮教信義為天南第一名州

苟或馭失其道則鹿挺登山遙騰入海强悍好勝未易
安集富而教之斯其時矣統計十邑陸地為山者十之
七為田園城郭廬舍者十之三人多地狹豐年猶苦不
贍故每仰給吳越惠潮臺灣之米資海運以無憂撫摩
噢咻蓋其難也漳平龍巖之間深山密箐數百里人跡
罕到奸民往往嘯聚邇者陳首魁陳五顯前後招納亡
命皆在此間非得重兵鎮之未易永絕根苗爾平和南
靖亦多深山民剽悍樂鬪睚眦相加即操戈動衆以敢

殺為榮又每穿窬攘奪姦宄成風離縣既遠吏亦難治
前議者欲于山中設捕盜同知兼戢數縣良亦甚當第
其議未行俗難猝革漳浦盜賊多出南靖之車田平和
之三角徑車田去靖邑最遠往返四日不服靖治距浦
邑不過十五里又以非在疆域之內不得而治是以一
方之民家屠牛畜戶抗官租專為盜賊毒流遠近前靖
令劉君宗業議割車田十五保歸浦以清盜源浦令惡
其為藏垢納污之所未免畏盜案叅罰有狃于便安之

見堅意不納坐失事機今不幸劉君捐館車田終無寧
靜之日也三角徑距平和往返亦須四日離浦邑僅三
十里近者既非其屬無所顧忌遠者鞭長不及殺越人
於貨賈不畏死非其天性習俗之固然亦未聞法令之
過也誠得留心民瘼之君子割遠就近不過數年盜源
永清三邑皆受其利詔安烏山九侯之東有櫟林山焉
廣遠深險巖嵒盤礴多石屋可為巢穴俗稱十八洞者
明末為患數矣今姦慝遁居作逋逃藪實為南詔要害

設守備彈壓之亦不可少此全漳形勝之大槩也一州之地以龍溪為元首長泰南靖漳平其肩背也漳浦海澄其腹心肺腑也平和詔安龍巖寧洋其四肢手足也方今海晏河清無伏莽乘墉之患如人安坐於家中大疾不作肢體便利惟有時其飲食無致饑渴時其衣服無傷寒暑時其沐浴無俾垢穢將不久而自肥何必借重於浸苓藥石哉渾身皆是肉無處可容錐刀是所望於調養者

瓊州府圖說

瓊郡周環皆海也屹立萬里汪洋中為全粵西南之保障內則萬峯峻拔黎母五指山儼若天柱外則十三州縣星羅匝布廣袤十有餘里上拱神京下俯諸夷占城真臘交趾直可以足蹴之形勢之雄中原未有也郡北十里為海口渡海六十里為徐聞距廣東省城一千七百里附郭曰瓊山居海外全島之極北崖州居島之極南東陸萬州西陸儋州實分四隅而峙焉由瓊山東行

八十里為定安百六十里為文昌二百九十里為會同
三百五十里為樂會四百七十里為萬州五百八十里
為陵水一千一百一十里為崖州此瓊島東方諸州縣
惟定安為腹裏其餘皆濱海也由瓊山西行六十里為
澄邁二百三十里為臨高三百七十里為儋州六百五
十里為昌化九百里為感恩一千一百里為崖州此瓊
島西方諸州縣皆導海而西而南者也其海道周環俱
通東行由清瀾頭調懶博教蓮塘李村諸港五日可至

崖州臨川港西行由東水博鋪洋浦烏泥抱羅諸港六日可至崖州保平港俱有港汊可以灣泊大抵十三州縣民黎雜居峒窠舫屋無處無之居近地者為熟黎供賦役極忠順居深山者為生黎又深者為生岐皆不服王化舊常出為民患五指山謂之黎母竟若蠻獠私家漢人不得過問一隅之地如分秦越非

國家之體也瓊莞古誌云瓊郡由定安過南閭入光螺峒四日達崖由白石村過風門嶺三日達萬又自郡城

由澄邁黎中二日至儋州自儋州東踰黎峒二日半至萬州
由是觀之瓊崖相距不遠特黎岐中阻遠途一週是以千里
而遙其當開通黎道無疑也曩日五指大山人跡罕到不知
中間黎峒情形今則採辦木植官吏窮極幽深來往無礙

聖化翔洽湮鬱將開寧復鬼窟視之乎吳會期云
自府至沙灣三百里自崖至羅活三百里俱為坦
途其中未開通處不過二百里耳普天之下莫非
王土豈有十三州縣衣冠文物之王民反為蠻鬼藩

衛僅居邊陲之一綫獨虛其中以讓黎岐為聲教不及之地腹心弗治四體雖安欲保百年無病斷不可得稽古志乘黎獠叛服不常是以昔人建議紛紛欲開通中間十字大路非無見也此路一開四通八達黎岐無險可據脫有蠕蠕思動臥榻左右皆為捉賊立功之人自不得不陰消其桀驁鋌走之氣彈丸黑子所闕正甚大耳明韓俊請立州縣屯所撥在外軍民雜處於中引開五指山十字路均通四處往來立甲約束楊理請俟五

十月禾熟之際以兵據其收成妨其耕種脅使開路吳
會期亦請以兵威削平開通十字大路建置城屯海瑞
請設治黎專官招民置軍立里學創縣所諸議非不甚
善特用兵未為得宜建縣設學分防戍守須待經理之
後亦非可驟而致撫之以恩綏之以道以黎招黎俾生
化熟潛移默化而不知一二年內此功可成惟有經濟
之君子不動聲色而辦之開萬古未開之版圖與舞干
格苗同其休烈非見小欲速者所知也

潮州府總圖說

潮為郡當閩廣之衝上控漳汀下臨百粵右連循贛左
瞰汪洋廣袤四五百里固嶺東第一雄藩也附郭曰海
陽為十一邑領袖潮陽在其南澄海在東南惠來在西
南皆海國揭陽普寧為西南內地大埔在郡北程鄉鎮
平平遠在西北饒平在東北五邑皆介萬山中而饒疆
亦大半海國焉近海諸邑多平原沃衍宜稼圃佐之以
魚鹽謀生較易入山諸邑人稠地狹崇岡大阜種稻黍

薯芋如懸崖瀑布尚苦不給多備力四方則亦未如之
何矣由閩入粵以分水關為要害由贛入潮以平遠八
尺為要害皆坦夷周道戎馬所經由汀入潮以大埔石
上為要害溪險灘高舟行石阻販夫之所往來也若鄧
艾入蜀則此途已為康莊而上杭亦有山徑可達程鄉
武平分水凹可達平遠未可以羊腸而忽之自惠州長
樂而來則畚坑為門戶自海豐而來則葵潭為門戶自
海豐甲子所而來則龍江覽表居然天塹自海而來則

南澳澄海達濠海門神泉鎖鑰固之內溪水道以三河
為要害三河堵截則程大平鎮與郡城聲息不能相通
獨由陷隍出畚坑為山行捷徑耳其半途有通判府在
羣山中最為要害縱橫離縣治皆數百里守備空虛倘
有宵人伏莽則心腹之疾也揭邑極西有河婆大山深
僻為從來盜賊窟穴礦徒出沒之區莫有知其要害者
經之則惠潮之樂土置之實兩郡之隱憂曲突徙薪於
斯二者加之意乎海宇昇平四郊若繡襪襖如雨絃誦

之聲相聞富而教之固官斯土者之責夫

海陽縣圖說

郡城北二十里有海陽山縣治所由名也海陽為附郭首邑跨金山入我城內韓山峙其東塹以大江鎖廣濟湖山屹其西若虎伏築陴高壘為西南環衛勢稱雄矣由韓山東行五十里過白石嶺為饒平分疆則入閩孔道也出西南三十里為萬里橋接揭陽界從此陸行七百里至惠州順流而下三百六十里達省城所謂南路

者是也其北一百二十里為大埔界三河之水出焉西北二百二十里與程鄉犬牙相錯郡北水程起城下惡溪韓文公驅鱷之處汧三河而上由程鄉踰岐嶺歷惠州抵省一千五百餘里則所謂北路者乎城南六十里為庵埠邇海蒞烟火萬家商賈百貨之所集也過此為澄海界東南三十里則澄饒之壤胥接矣大抵一縣形勢後依山陵前臨水澤南方多平疇沃壤一望無際村落整齊桑麻茂密北方多崇岡疊嶂澗谷蓄畬佐以莧

芻瘠土之民所嘉者嚮義耳顧山深地僻莫如豐政一
都潘田仲坑伯公隘皆要害明季嘯聚者多移通判鎮
撫之為通判府關山之壯田土之饒地闢民稠居然一
都會也南望縣治北望程鄉東望大饒西望長樂皆二
百里有奇雖鞭之長不及馬腹今以潘田一巡檢寥寥
塘汛十數兵處之泰然太平道洽自古未有也閒暇綢繆
盛王不廢通判府雄據上游實拊邑治之背仍應顧
名思義移郡倅彈壓其間以守備一營為專汛仲坑伯

公隘添設防兵而仲坑巖谷深邃尤為藏奸之窟礦徒
窺伺宵匪易集更當力為防閑苞桑之固不外乎此庵
埠已移縣丞分治內外周密山海救寧惟東南廂登雲
登隆隆津江東諸都承韓江三河之流汀贛循梅來源
千里高屋建瓴奔趨而至雖支分數條涸溪蓬洞大牙
並經澄饒入于海然兩岸田疇俱屬低窪年年有堤決
之患倘修補不時雨水驟漲蟻穴一開數十里井疆皆
為魚鼈則官斯邑者所宜加之意耳農田水利亦經國

之遠猷夫

潮陽縣圖說

古潮陽縣在臨崑之麓唐元和間潮州刺史韓愈移建
棉陽即今縣治也左右皆山前後皆水形勝視他邑特
奇其前之水曰前溪即練江由滄州出海門其後之水
曰後溪由潯洄出牛田皆海若也其左為東山怪石嶙
峋邑東之屏衛乎山外海汊橫截磊口河渡分南北二
門淵乎若天塹然過此為達濠招收砂浦兩都邑東之

外衛也邑之右為龍首山蓋自鐵山迤邐百里入縣治者鐵山在貴山都為邑治諸山之祖騰躍奔放疊聳層巒直抵曾山下龍首飛舞蜿蜒有矯若游龍之勢稱地靈者指屈焉山南山北皆百里平時故產穀之區也凡邑田賦皆在坤乾二方其餘非山即海魚鹽芻茭為業耳其地廣一百七十里袤一百二十五里獨城之前後為最儉自潯洄汴流穿城渡江抵草蕪統計不過四十里澄海惠來犬牙逼于胸背卧榻之側斲他人矣裒多

益寡當以惠邑之徑口關為界關北四十里咸歸潮陽
草蕪田心永得寧靜則亦還所固有耳其隨山左右之
水分南北二條南條合貴山洋滅之流經林八渡過臨
崑出和平橋由練江入海北條合海陽普揭之流滙南
砲臺出門關石井二砲臺過桑田入海南砲臺在縣北
稍西九十里當海揭之衝西南一百四十里有寒婆徑
當葵潭之衝自寒婆徑迤南有鹽嶺雷公嶺徑口關當
惠來之衝邑西與普寧連界貴山滅水兩都壤相錯焉

麒麟埔樟岡狗眠厚山北山果隴埤塘皆強悍所宅穿
窬奪攘之患普罹其殃逋賦抗租魚肉田王毆差拒捕
邑亦大受其困官斯土者不可不振起精神於此間一
整頓之也沿海要害有海門達濠二營水師雄踞城垣
堅整足遏外來艘舶之衝錢澳河渡廣澳蓮澳攷難山
諸砲臺皆分兵戍守戰艦星羅安所庸更議哉潮邑時
務惟在版籍混淆地畝不清有糧無田之弊累靡終極
盍于此加之意乎城左濠溝隨潮出入為邑東小河前

溪後溪脉絡相通之處轉運諸舟皆賴之所慮沙淤水
淺推挽維艱則疏濬深通因民所利亦輔相天地之宜
為王政之一事夫

揭陽縣圖說

揭陽縣治在河之洲四郊皆洪流斷岸環城內外胥澤
國也平時無際綠稼如雲舟楫從橫依稀三吳風景潮
屬十一邑推最勝焉北條之水源發程鄉長樂分水界
流經貴人飛泉諸山東合石碇循梁大羅諸水過楓口

分東西二流夾縣治會南溪出砲臺入于海南條之水
源發海豐長樂分水界沿河婆百折而東過湖口合古
溪經南城下會北溪出砲臺入于海二溪餘流貫穿城
內濛洄繚繞昔人詩云城中竹樹多依水市上人家半
繫船可以想其繁云其地廣二百八十里袤八十有五
里北控海陽南連潮普東鄰澄海西接豐樂黃岐紫峯
桑浦瘦牛四山環列其邑四維之望鎮乎揭陽山在城
西一百五十里為邑治諸山之祖飛泉巖壁立萬仞即

秦時戍五嶺之一先賢晦菴朱夫子嘗遊其上有落漢
鳴泉故蹟焉東南北疆域或七十里二十里五六十里
純乎水鄉西二百里西南百二十里西北九十里與長
樂海豐相錯則自二三十里外純乎為山陬矣西北猴
子洞險隘峻絕直出長樂興寧為惠潮要害西南河婆
諸山綿亘深遠高原大谷田園孔多接連海豐永安諸
礦山為奸徒窟穴盜賊窩巢歷來抗法之區近雖極為
斂戢不可無善後之經畫其地藏匿萬山四通八達西

南一帶距海永河龍各縣治遠至六七百里在左右者亦二三百里防守寥寥伏莽潛滋深為可慮似宜添設縣治彈壓其間割海豐一二都附益之設叅將一營防兵一千分守要隘庶蠶叢鳥道可得寧謐而惠潮兩郡無礦徒山寇之憂亦未雨綢繆之急務也揭邑至海尚百有餘里南北砲臺扁其內青巖石井二砲臺鎖其外潮陽澄海為之障蔽此不足煩區處惟邑治落地稅十縣所無而揭獨有之始于明季閩省海船進港市糴而

設迨後閩商不至稅無所出權就通邑貿易抽分補之
歲額一千八百六十二兩有奇院司道府緡頭規例各
如其三之二雍正四年裁革陋規不為限額隨所收多
寡為賦民稱便焉但揭邑非商賈輻輳之區北溪舟楫
上止萬里橋南溪舟楫上止普寧棉湖貨物所出甚為
微渺其自外洋至者必經砲臺海關權稅在焉此二十
里內之落地稅似屬重出之征可否略為變通使揭邑
郊垌得與十縣商民均沾樂利是所望于太力之君子

程鄉縣圖說

程鄉者南齊處士程旼所居鄉也旼以匹夫為善化鄉人其後人思其德因以其姓名其鄉隋大業間即其地設縣治因以名縣南漢劉鋹割置敬州宋太祖改為梅州以漢將梅鋗封邑也梅程變更歷代非一至明省州入縣而程鄉定矣嘉靖崇禎間屢分其地設平遠鎮平二縣而程鄉小矣雖然不小也廣二百二十里袤一百九十里踞郡上游當江贛入潮之衝遏閩汀揭粵之路

為三省之扼吭兼六縣之輔車可不謂巖邑重地乎東則上井銀子隘皆接上杭為萑苻逋萃之藪南則馬頭山八郎廟路通海揭越人于貨者所憑依也自西自北則平遠鎮平之石窟樟坑腰古鐵山嶂皆向來匪類窟穴為我隣封勦我臥榻時際盛平亦不足深論也環邑皆山在城之內者曰金山外曰東巖曰西巖皆培塿止供憑眺遠且大者曰明山陰那山王壽山皆高挿天峭壁幽奇索隱行怪者宅也銅鼓嶂高亦如之則蹠徒舊

窠與海陽大埔共之黃沙嶂天馬山聳秀峯九狼雙筆
諸峯雖高僅三四百丈亦表表可名者相公坪曲江風
度則不以高卑較矣其大川曰梅溪曰程源亦名程江
溪從鎬江從畋也梅溪源出龍川長樂合七都興寧之
水曲折而東繞城南邑治之襟帶也程源出義化鄉即
畋故里今在平遠境內由石坑韓莆逶迤二百里歷西
郊而南匯梅溪邑東四里有周溪源出平遠而流小因
濂溪書院得名也又十里有自東而西流者曰西洋溪

又有小河引之東匯則鎮平水口也凡邑之水皆會松
口下蓬萊灘出三河趨郡城入海崇山邃谷孔道所經
舟輿絡繹商旅紛如奸宄潛滋之患或亦逸豫所不免
專城重寄僅僅千把末弁數十分防之兵可恃為干城
乎粵中武備密於海疆而疎於山莽似宜加之籌畫夫
饒平縣圖說

縣治在萬山中所屬南澳又在大海中黃岡柘林海山
鴻門皆汪洋浩漫驚心駭目大山大海控扼全閩屹然

嶺東鎮鑰馬饒之為邑也雄哉廣一百九十里表一百
八十里南澳渡海水陸又七十里泱泱大國未可以貢
賦無幾小之城北之山以尊君為名教忠也望海嶺在
其東天保山在其西天馬繡衣在其南皆作鎮于近西
南待詔山產土茶潮郡以待詔茶著矣鳳凰山高壓羣
峯邑西巨鎮亦郡城之望乎尖山在東洋屯連閩漳多
險阻為伏戎之區白鵬山險亦如之土賊陳弔眼擁衆
處也縣北六十里為九峻山通大埔烏道崎嶇張璉所

巢縣東五十里為老虎關通詔安東北六十里為柏嵩
關通平和均在分疆之閩漳潮巖險要隘也西北五十
里為張公嶺與大埔單竹坪連界有山路可達高陂西
七十里為南嶺棟與海陽石坑接壤有小路可達隘隍
西南九十里為秀才徑饒海分疆當郡城孔道自邑抵
郡一百六十里抵省一千八百里饒邑要害之在山者
止此矣濱海重地以黃岡為最要黃岡在東南九十里
當閩廣之衝副將巡檢防之而不足復移潮郡同知彈

歷之由黃岡東行三十里至分水關為入閩孔道自關抵福州省城九百五十里耳東南三十里為大城所又十里為柘林水寨故明置重兵於此黃岡之南渡海為南澳南澳四面大洋山崖險峻周迴三百里為閩粵兩省咽喉重地自古海賊盤踞之區朝光跳梁倭黨肆虐大為邊患今設總兵官鎮守之分隆深雲青四澳雲青屬閩隆深屬粵宋少帝泊舟具南丞相陸秀夫有墓在馬鴻門海山在澳西北東石浮礮與井洲蠟嶼皆內海

星羅也沿海港汊以草尾港為大南洋竹木穀米諸貨之所通也五塘六澳灣港樟山橫山下岱諸港弗可悉數海波不揚魚鹽蜃蛤之利無處無之千秋百世太平常如此日循良可坐而理也

惠來縣圖說

惠來西北萬山東南大海形勝與饒平相類饒控漳潮之衝惠當惠潮之界吭扼險阻亦相類饒有黃岡南澳重兵環其外故邑治建萬山中惠來向若百千里上下

茫茫杳無障蔽故邑治必濱海隅因地制宜昔之人固
有道也時丁明季寇攘奸宄析潮陽之隆井半都大泥
西頭惠來三都海豐之龍溪一都作邑建城嘉靖四年
間事也廣一百七十里袤五十有五里後枕五朝前臨
海若百花虎頭二山峙其左葵嶺石牛兩峯列其右諸
溪繚繞田疇平曠附郭形勝之大觀也東則金剛雙髻
聳秀一方黃岡華古高隱之所宅也西則達三埠冰山
頭虎頭寨盤紆險峻山寇之所巢也千秋鎮在邑西七

十里水遠山盤宋處置使鄒鳳駐兵銘石處也又有千秋鎮石在葵潭之西十里宋少帝屯兵其上有永鎮千秋四字題石與邑西南三十里許之聞雞亭山皆當年元兵逼迫間關播越故蹟也望天石山在西北九十里嵯峨挿天上多水湖北麓三坑肚潮陽交界盜賊向來窟穴人跡罕至之區也鹽嶺雷公嶺徑口關三途當東北三面拊背穿心潮陽入戎之要害也黃山徑在縣西八十里通海豐狹不容車宵小所出沒也葵潭在龍溪

都萬山之中當閩粵孔道奸匪潛滋長鞭之馬腹也近
裁北山驛改設巡檢於葵潭行旅往來之所便攘竊私
梟之所畏也自海豐甲子所而來以覽表渡為扼吭風
濤偶作洶湧莫當龍江西南之天塹也自海而來則東
有靖海所築城駐防水師戰艦之所守也縣南十五里
有神泉城神泉港口有砲臺足壯金湯水師兵防把總
巡檢所駐劄也東南石碑澳赤山澳澳角溪東諸砲臺
武震雷輦沿海折衝之屏翰也內地諸溪皆細流惟龍

江可容舟楫上通葵潭合梅林南陽之水會溪口而下
出神泉入于海祿昌溪源出鹽嶺流經白沙繞赤洲亦
達神泉光華溪在邑東四里源出大輦山經虎頭合龍
潭洋之流亦出神泉神泉一港衆流之所歸也山海交
錯厥田中下岡阜高而溪流淺一日大雨山水驟至平
地皆化汪洋兩涯之間不辨牛馬十日不雨膏腴龜裂
禾稼焦枯以足蹴泥如撻利刃農夫之所躊躇也疏山
浚泉修陂池水澤之利時其蓄洩田間鑿井教民桔槔

人力補天工之缺太平司牧之事也山川間氣蔚為人才作邑多年精英未洩鼓之舞之誘之掖之使士皆聞道不為邪說所動搖人盡奮興不為勢利所汨沒作忠孝以興仁讓經濟文章皆為有用實學移風易俗之先務也海防周密山莽肅清不於富教二字殫厥心力雖卓魯龔黃無所施其巧也

澄海縣圖說

縣為海氛設也故名澄海取澄波之義云明嘉靖四十

二年析海陽之上中下外三都揭陽之蓬州鰲浦鮫江
饒平之蘇灣建澄海縣在郡治東南六十里即古闢望
司故地也大海之濱沮洳之宅平沙四望洲渚無數溪
港從橫參差繚繞洋洋乎水鄉也哉綠樹晴波依稀一
小蘇湖鹹潮斥鹵海風猛勁景物微有不同耳幅員所
屆東西三十里南北六十有五里絕長補短成周一子
男國也環城之水四圍如帶為玉帶溪源出北港流出
南港南港在城南五里北港在城北五里其源皆出于

韓江自韓江下橫隴溪分水東流經東林程洋岡出南洋東湖南灣入于海者北港也自橫隴溪南流至大牙東分一派經上窖沈洲外沙入于海者南港也二港為附郭屏翰前後金湯包羅固焉南港之南自大牙西分一派經蛋家園漁洲富沙橫窖諸村入于海為新港自蛋家園分水西南流經漁洲隴尾分一支東流入于海為東港又分一支西南流入于海為西港自漁洲隴尾西分一派經湖頭市舉登諸村入于海為溪東港凡水

在邑南入海者有五五港皆本于大牙則韓江橫隴溪之右派也其橫隴溪左派至程洋岡亦分兩支一從北畔山尾溪經東隴烏塗尾入于海為東隴港一從南畔下北港者至南洋又分四支皆在北港之北一為蓬子港一為大洲港一為飛錢港一為旗嶺港皆入于海旗嶺港距城十五里洋艘所泊凡水在縣北入海者有六六港皆本於橫隴溪則左派也其山皆培塿不足數獨蓮花昂然三百丈為邑治後辰在城北四十里半屬饒

平神山低小巖景佈置頗可觀與龍船巖之石室均遊人所托足也大萊蕪小萊蕪二山皆在海中邑東之保障也潯洄山在西南內洋中與潮陽接壤自邑視之如拳然一縣形勢以大海為要害海寇蕩舟乘潮可入故於沿海港汊設砲臺以控扼之在海中則有大萊蕪放雞山二砲臺在各港則有溪東沙汕頭三灣東湖平洲山頭子東隴鹽竈諸砲臺星羅棋布可云周密南洋樟林蓬州所鷗汀背皆有城堡扼塞藩衛有形之險阻不

過如斯矣盛平化洽島嶼風清武備兵防徒為壯觀之
具道之以德齊之以禮使人人尊君親上祇父恭兄是
無形之干城也

普寧縣圖說

普為邑故潮陽分地也明嘉靖間以潮陽地廣梗治析
洋烏減水黃坑三都置普寧縣以貴與為治所萬厯三
年移厚嶼即今縣治越十年潮陽復以洋烏減水歸僅
存黃坑一都以履畝丈糧一都遂贏賦額故也絕長補

短方四十里山川之秀土田之沃民俗之馴猶可以為
善國焉輿圖似圭而單薄左十里與潮陽貴山都連界
洞仙陳洞二徑為門戶右十五里與揭陽棉湖連界邑
南十五里為大壩墟與潮陽貴山減水二都連界當海
豐惠來孔道從茲至省九百四十里耳北十里有洪山
為邑治後宸東北二十里入揭陽境由揭抵郡一百二
十里耳西南七十五里為龍根磔與揭陽惠來海豐三
縣連界大溪自河婆下鯉湖出湖口合雙溪朝宗于揭

此揭普分疆之流獨棉湖市鎮二三里地越入溪東似
贅疣在普界內殊不可解城南之水源出鐵山而細微
流至東門百里橋始通舟楫經石潭過林垌出古溪口
合棉湖大溪亦入于揭地無他產百貨不生穀米薯芋
嬉嬉樂業有勤儉而無驕奢官斯土者樂培之所慮徧
小太甚鄰封偏迫果隴北山麒麟埔樟岡狗眠强悍所
聚皆在卧榻穿窬攘奪探囊拾芥追之則越境乃免捕
之則法不踰域去疾防閑莫先于此宜劃減水一都貴

山半都洋烏都三分之一以赤肚嶺貴與湯坑鹽嶺為
界歸之普邑則在潮無長鞭馬腹之虞在普無隔屬掣
肘之患兩邑吏治民生均有裨益而雲落吉安兩巡檢
亦可裁去其一斯一舉而三善備矣顧或者以舊案洋
烏為請則不達兩邑形勢又或以得地為榮失地為辱
皆一片私心非為民為

國之道也

大埔縣圖說

縣小賦薄而以大為名埔邑是也其地廣二百二十里
袤一百七十里洵不小矣山多田寡磽确崎嶇名為大
而實未大耳介閩粵兩省之交東鄰永定西瞰海陽南
接平和北控程鄉西南與饒平錯壤東北為上杭連界
六縣唇齒輔車相依雖曰僻處山陬實汀潮間一樞軸
可不謂雄且壯乎天下治所多面南獨埔邑朝宗北向
茶山形勢如衆星之拱辰極蓋有教忠之意焉東西之
山若風波嶂陽石峰皆邑望鎮文峰屹其南赦文峙其

北天梯華表壯三河之勢閩羅石為閩粵之限陰那山在邑之西北半屬程鄉郡治諸山之祖也其川之大者有三曰大河曰小河曰小溪大河在縣西上接神泉河合大靖小靖諸溪之流凡水自平和南靖永定上杭來者皆入馬潮人赴閩汀江浙必由之水道也小溪在縣西南自平和赤石巖而下合清遠黃砂諸流曲折北注與大河交會潮人由平和入漳州必由之水道至赤石巖而陸矣小河在縣西北源出惠州之龍川合長樂興

寧程鄉鎮平諸溪之流下三河潮人赴江西廣省必由
之水道也凡邑之水皆匯三河三河在縣西四十里為
四郡往來要衝明季設三河司巡檢築城守之至今不
廢烏槎巡檢司距縣百里在高陂有山徑可達饒平大
產司在縣南百里密邇平和界皆盜賊出沒要害也架
險峒巖不一其地若楓朗平砂虎頭砂陰那口鵝鵲坪
天門嶺諸要隘崔特作孽咸在此間九峻山羊腸九折
為饒平捷徑山寇張璉之所巢也長害在縣東北十里

許土賊鍾七鍾八跳梁處也銅鼓嶂在縣西八十里程鄉海揭與埔邑各分一面古為盜窠明末鍾凌秀弄兵于此皆留心防禦者所不可略哉時際隆平山無莽伏講孝弟力田墾闢蒿萊之政修陂池水澤之利潤谷岡阜皆種竹木槎蘂伐天並為厲禁財用足而禮義興雖彈丸小邑泱泱乎大國風矣

平遠縣圖說

平遠在萬山中故程鄉興寧分地也介三省之交與江

閩接壤者半東鎮平南程鄉西南興寧東北武平自北而西皆章貢疆域矣廣百里袤一百三十五里舊志侈言之廣袤皆加一倍按之無有也項山聳其北鳳山屹其南東西阜巒迫峙俯臨堆堞周迴如蜂擁求一二里平原之地弗可得已鐵山燕子五子石諸峯懸崖密箐為山匪窠巢探丸弄兵者屢矣石馬嶂梁畝徑則接長寧丹竹樓偷牛棟尋風還則連興寧大帽山嶺藤還沿繩峯則近武平分水凹石正鄉則迫興寧竹牙寮皆亡

命出沒之藪為邑要害分兵設防扼其吭而鎮壓其邪
心詎可以盛平而忽諸山高水遠舟楫之所不至溪澗
涓涓無足道者人民土田亦號繁庶食力衆而豪富稀
磽确多而平時寡銖鐵之利江閩所資其餘百貨不出
不聚儉嗇褊急得無有魏風乎禮教信義培而廣之廓
如也竊怪平邑百里內山川形勝無如大柘一鄉其地
廣平數十里畝皆膏腴居極殷庶遠峯挿天環羅若城
郭正大寬舒之氣蔑以加焉建邑築城於其中固巍然

大縣勝槩也且距壩頭泊舟處不過十里商旅亦便即
大柘一河略浚數里大河舟楫可達城下又當筠門嶺
程鄉孔道衝要足為潮贛鎖鑰當年作邑之人不知果
何所見舍大柘而問豪居豈避衝繁求僻靜厭喬木入
幽谷耶今欲移縣治則安土重遷因陋就狹則鬱塞不
暢始信披荆剪棘必須開闢草昧之才庸夫見淺狃於
小而暗於大貽誤可勝言哉賦僅三千人稱桀黠周行
不遠供億亦煩未可以曹檜無譏遂弗留心於民瘼惟

官斯土者勉之

鎮平縣圖說

鎮平作邑為萑苻也三省之交山峒深阻明季屢為賊
巢遠邇生靈橫遭塗炭崇禎六年始割程鄉之龜漿松
源平遠之石窟得地四圖遂建鎮平縣治儼然與十邑
比肩稱雄斯亦偉矣封域廣八十里袤七十里自東而
南程鄉屏之自西南而西平遠藩之西北而北武平衛
之東北一路上杭障之四塞之國皆山川所盤踞也斗

大城池環桂嶺于內能容烟井幾家哉後擁三台前峙
九子天馬誥軸鳳山龍嶂森羅列翠不勝名狀大嶂峰
屹立于東山半有湖平洋寬廣可容萬人奇花怪石山
城之勝槩也胡椒逕在縣東三十里直通上杭永定諸
山輿折鐵礦所生奸宄窟穴古稱要害大密逕在縣北
三十里崇崖深箐伏莽跳梁者屢矣鐵山嶂半屬平遠
天門凹與五子石連界梅子畲與武平平遠連界皆有
名奸數諸賊入寇之要害兵防捍禦豈堪緩須臾乎西

北之水長潭為大長潭源出武平與綠水湖相通平原中獨出一湖蓋奇觀也東北石窟溪亦出武平皆會馬鞍潭合橫梁徐溪之水東流入于程鄉其他細流無足數者田少山多人稠地狹雖有健耜肥牛苦無可耕之地羣趨臺灣墾闢成家臺中容子庄數十萬衆皆程大平鎮人民而鎮平尤倚賴之竟以臺灣為外宅如二畝半在田二畝半在邑之意今臺禁森嚴宜留心防範化導約束無俾為非查縣志有禁墟之說是益促其謀生

之路匪類要結豈必墟期苟平其政何難稽查况使闔
邑人民一疏一粒必赴城市恐亦不勝其煩何如使墟
地皆化市塵齊之以日中之政百貨流通餬口較易又
令百里山川盡種杉松竹木官為巡守厲禁侵盜十年
之後有不富饒者乎忠信甲冑禮義干櫓庶無負作邑
者曰鎮曰平之義則良有司之責也

潮州海防圖說

潮郡東南皆海也左控閩漳右臨惠廣壯全潮之形勢

為兩省之屏藩浩浩乎大觀也哉春夏之交南風盛發揚帆北上經閩省出烽火流江翱翔乎寧波上海然後窮盡山花鳥過黑水大洋遊奕登萊關東天津間不過旬有五日耳秋冬以後北風勁烈順流南下碣石大鵬香山厓山高雷瓊崖三日可歷徧也外則占城暹羅一葦可杭噶囉吧呂宋琉球如在几席東洋日本不難扼其吭而擣其穴也茫茫大海無樊籬之限守之有道則萬里之金湯防之偶疎亦衆敵之門戶膺斯任者難矣

全潮海疆不過五百里上自南澳下迄甲子門中間島嶼湧港歷歷可數柘林大城所居南澳上游有雞母澳後澳虎嶼獅嶼紅螺雞冠西澳諸山及橫山青山鹽漏上里諸砲臺與閩之銅山懸鐘接界明人防海知設水寨于柘林而不知南澳之不可棄遷其民而墟其地遂使倭黨紅彝盤踞猖獗吳平林鳳林道乾許朝光曾一本先後盜兵邊氓塗炭萬厯年間始設副總兵守之國家鎮以元戎遊魂永靖蓋閩廣上下要衝阨塞險阻

外洋番舶必經之途內洋盜賊必爭之地去留明效固彰彰若此也南澳四面大洋周迴三百里分隆深雲青四澳雲青屬閩詔安治之隆深屬粵饒平治之左右兩營分守各疆亦以福廣名青澳在東濤流險惡無泊舟善地雲澳在南近岸皆沙水淺風飛巨艦亦難停頓是以左營舟師必分深澳駐泊以深澳鎮城所在元戎旌節之區也深澳面北半倚山阿外險內寬千舟可聚若北風狂發則不如隆澳之安隆澳在西南南颶驟起則

又宜于深澳深澳之口為青嶼為蠟嶼青嶼石峯奇矼
有海闊天空四字古蹟蠟嶼砲臺有兵防守與長山尾
汛皆捍門要地也黃岡之南為大澳為獅頭為鴻門為
信洲為柏洲為井洲南澳西北四十里為海山海山雙
峙汪洋中與南澳黃岡相犄角溪南防汛為東石溪北
防汛為浮罈各港洋面鎖鑰固焉下此為侍郎嶼為三
嶼為五嶼水際卷石嘒然小星賊艘偶衝亦有不攻自
破之妙澄海洋中為大菜蕪小菜蕪為放雞山放雞屬

潮陽境澄海協弁兵守之過此為達濠亦在海中潮陽
東方之保障也自明以來屢為寇壘許棟張禮邱輝憑
陵肆毒而輝殺掠無已慘酷最甚康熙二十年設副將
兩營屯劄今改專汛守備城池戰艦屹然稱雄藩內則
磊口河渡分南北兩門外則放雞蓮澳廣澳砲臺羅列
其誰敢撓之下此為東嶼為西嶼西過龍潭鼻為錢澳
砲臺則海門營出口之要害也海門城據山臨海有水
師叅將駐劄猷猷灣河背兩岸砲臺皆在城下為潮陽東

南保障出口迤西為靖海所靖海有城有砲臺屬惠來境海門守備分守之靖海而南以石碑澳為要害賊舟屢泊登岸剽掠赤山鉛錫石井諸澳皆苦海氛而神泉為尤甚神泉登岸十五里則為惠來縣南門上下舟航皆入此港然惠邑第一要害築城港口駐劄防兵左右砲臺威武震疊華清甲子作我屏翰而海濱有長城之勢矣甲子為惠潮樞軸有碣石水師專守不容越俎代謀潮屬海面如此而已港澳雖多沙礁暗阻風濤不測

舸艦輒碎非熟諳港道者弗敢輕入商艘往來不過旗
嶺汕頭神泉甲子他皆非所戀也奸宄潛浮雖不擇地
亦在附近島澳可以泊舟之所不能日夜飄飄外洋且
其意在劫船遠出安用必有坵澳可以棲身乃能窺伺
商艘之去來必待風和浪靜乃敢駕駛出洋以行劫好
生惡死盜賊所同豈曰不如官兵之甚乎官兵哨巡但
出稍遠略觀港口島澳雖有賊船何處停泊豈果必發
矢開鎗而有拒敵之患乎大帥小弁分哨會哨非不耀

武揚威昂然身登戰艦張大其事名曰出師乃南澳出
師不過長山尾澄海出師不過沙汕頭達濠出師不過
河渡海門出師不過猷灣碣鎮出師不過甲子天妃廟
坐守數月及瓜而還罕有離岸十餘里試出海面優游
者商船被劫雖城下亦誨之外洋雖營邊亦移之鄰境
彼此互推經年不倦若其海菜魚蝦微利所在戰勝攻
取如臨大敵太平無事習與性成亦不足為怪也

聖主德威無遠弗屆海波不揚隄溢肅清居今日而談

防海等之一幅西湖圖耳然閒暇綢繆聖人以為知道
文武寅僚同舟共濟善相勸過相規協恭和衷之誼也
百爾君子共勉旃哉

修志雜說

志者記也所以記沿革廢興盛衰臧否亦古史之流也
在國為史在郡縣為志則亦有學有識未可以補鍋之
匠鑄湛盧哉竊謂方隅紀載皆闕政治隨事提撕當與
通鐸不殊非徒沿襲舊文登記簿牘已也舊志雖佳未

能於史乘彷彿且歲月滄桑諸事非昔難膠故輒將以垂法戒而昭治理遂不覺守舊之鄰於創新亦不得不然之勢者若謂有意更張則聽之知我罪我也夫

郡邑疆域城郭各有圖舊矣顧圖必有說舊志無之猶畫龍而弗點睛有形骸而不能運動泥塑木雕強命之曰人耳至所謂疆域形勝關隘紛紛布列按其實皆前人膠柱也歲月遞更陵谷變易則又當有因時制宜者茲欲便于觀覽統以方輿槩之有圖有說提封遠近犬

牙接錯形勢扼塞要害經畫綢繆之計披卷瞭然亦庶
幾少補於治乎潮郡故稱海國邑濱汪洋者殆半明季
島彝盜賊蹂躪不堪今雖極波恬浪靜亦留心經濟者
所不忍略也補海防圖以益前志所未備

山川蜿蜒奔放起伏實關郡邑形勢必由原邇委肢節
脉絡井井分明精神方得生動若但登記某水某山名
目處所直一屠酤薄賬耳茲編以迫於期限未遑躬歷
嶽原難為遙度就舊志略加增潤粗成章句而已草率

之譏所不免夫

學校所以教也舊志止載儒學處所及社學書院名目而已無學中之人無學中之禮無學中之教於自古立學之意何居乎茲編備載十二庠官師諸生名額恩拔歲薦鄉飲鄉射養老讀法諸典

國朝卧碑

御製訓飭士子文以及書院義學諸儒條規講儀學田等類弗厭繁賾誠以此地為人材所從出風俗所由成

不忍不加之意也

祀典之設所以崇德報功舊志文廟簡略無丁祭儀注
無陳設圖位無樂制舞節無執事贊禮人數皆非也禮
樂廢缺有司之過况郡僻在海濱性習喬野豈可不明
先王之度數以文之潮屬諸生至不能舉禮樂之名號
即問之捷南官通仕籍者亦懵然弗知為何物若復併
志乘而闕之則後有留心好古之君子安所考究此不
可不補者也名宦鄉賢壇壝城隍凡廟祠之在典禮春

秋官祭者皆附于文廟之後非此族也散見廟宇

國家大政莫如賦役兵防舊志簡略太甚止載奏銷數目不知戶口算賦代多重出之征田畝均輸亦有累加之弊詎可不考究原委彰我

朝寬紓之仁乎潮郡水陸營汛雖云周密然山深海濶要害孔多亦竊有苞桑之鞏綢繆未雨之慮一腔熱腸妄抒臆見皆前人所未及也

人物為一郡之柱礎鄉邦之光耀多多益善敢云採擇

顧必實係有德有功忠孝卓越文章品行確有可觀無論山林韋布皆足增輝志乘若徒以科名官階為人物謂貢舉南宮便可立傳則吾不知之矣至於閨貞潔節風化攸關顯微闡幽尤為當務之急然亦必期核實不以夫榮子貴遷就濫收一片苦心神明可對

風俗之成與時變易何為而列于志乘蓋將使官斯土者酌劑轉移俾咸歸於醇厚也則不徒勦襲舊聞亦不必諱澆漓悍健惟就近來氣習據實直書列入

聖諭廣訓以為移風易俗之大原使郡邑鄉村家家遵奉時雍風動不過如斯未聞

諭訓之先風俗若何既聞之後風俗又若何以此覘官吏牖民之誠否以此覘良莠變化之難易則斯志不為苟作矣

災祥關乎人事列之方書欲士庶共知修省感召天和不得獨諉其權於

君上也川原物產無在非厚生利用之資古蹟廢興安

往非立廉起懦之地可曰無關名教隨意點染為乎舊志古蹟載王莽南海亭是教人叛亂也載僧墳未化之臭腐是教人發塚也其他此類槩為削去要使登吾志者皆有益於世道人心不為悖理亂常之隱怪詎敢以其細而忽之

舊志廟貌淫祠槩入祠祀非古也特標廟宇一目以別於春秋丁祭者寺觀附廟宇之後從其類也琳宮梵剎布滿天下先儒常欲人其人廬其居矣若儼然與學校

祀典並列歟目便似為郡邑所不可少逃墨歸儒之機
安有期乎寺先書其廢幸之也修志不書其爵貶之也
使一方皆去邪歸正分此泥沙之金錢以祇父恭兄周
恤其族戚鄰里則修志者之意也

仙者何奇不過曰長生耳而其所謂長生者又不能留
塊肉以行於世必稱屍解夫屍解則非生矣佛者何奇
不過曰空耳無耳夫既空且無矣又安有所謂佛乎山
澤之民奉公守法終身不犯刑辟之條期頤耄耄皆仙

也存善心行善事一生無欲害人皆佛也倫常之地自有仙佛何必從事於幽渺不可知之途彼所謂仙與釋吾惡乎知之不知而謬為牽引則妄也吾惡乎敢斯志也非敢黜仙釋也闕疑也

漢書志藝文後世郡邑乘咸宗之然必其辭其旨有關是邦風土民物者始堪選載他文雖佳未遑也腐生代斷稱功頌德之碑豎儒無賴佞佛逃禪之語觀者欲嘔可命之曰文乎若夫陽儒陰墨虛寂良知似是而非之

異學尤為陷溺人心之大害舊志珍若誥勅併其斷爛
殘缺之篇亦皆錄載正學不明一至於此良可哀夫周
子曰文所以載道也害道之文豈忍助其酸而張之

鹿洲初集卷十二

欽定四庫全書

鹿洲初集卷十三

廣州府知府藍鼎元撰

說

江濱野人說

海豐君既以不合時宜為當途所嫉於是當途號為異
端或名之曰怪物君曰異端非聖人之道疑與二氏混
迹怪物何傷乎遂篆其章曰怪物鹿洲山人聞而笑之

曰咄怪物不可以為號請為君更號曰江漬君曰何謂也曰隱之也文之也而不見昌黎書大江之漬有怪物乎業已負其異於衆安能與常鱗凡介為匹儔則亦任世人之怪與不怪耳我固不必以見怪易操亦可不必以居怪自炫青波泥淖則存乎天矣仰首鳴號早知君不屑為也君家天長距大江為近人以地名亦固其所且漬為大防江流滔滔或虞泛溢所賴以砥狂瀾奠井疆蒼生無魚鼈之患厥功偉焉嶺外蠻江隨波曳泥已

成風尚獨君以一怪挽回頽靡立世道人心之防使吏治由之潔清丈夫胥存氣骨障百川而東之功豈在禹下哉君曰以若所云則吾豈敢顧余山野之性家近江濱卽謂江濱野人也可鹿洲曰此夫子從先進意也善夫作江濱野人說

王用九字說

江濱先生有令子曰錫疇請鹿洲山人字之山人曰諾先生曰疇年十一通五經自幼樂驚客不衣冠者命之

揖弗能也山人曰然是又欲存氣骨者弓而箕冶而裘
各有所肖君之子也而桀驚固其宜先生曰為我誨之
即名或未佳併改之山人曰佳哉吾聞諸箕子天錫九
疇彝倫攸叙疇之功用大矣彝倫為天地經緯邦家理
亂氣運盛衰所分在叙與斁耳錫則叙不錫則斁此名
所為佳也雖然疇有九自五行而下皆以一用貫之字
錫疇曰用九可乎道存於天壤不用則虛而無寄治心
修身經世理物皆有至當不易之宜踐而履之為德行

措而施之為事業墨守訓詁茫然不知所位置無用之
儒也有體無用不可以言學有疇不用不可以言錫惟
用九之勉之矣抑用九之義又取諸易亢龍有悔天德
不可為首也用九既年少有奇才恐挾持過甚賢智先
人或不能免是在涵養渾厚以學問陶淑其性情無使
稜稜圭角觝撓人世之諱忌斯乾元用九之意乎余與
乃翁皆以剛直取禍氣骨二字可為前車然欲使子韋
脂求容奄然媚世又非君子之道為宇宙立綱常為名

教存柱礎在乎子之善用之也於書而求彝倫之叙於易而識悔吝之幾吾所望於用九者蓋有深焉先生曰善夫請書之以為錫疇勗山人曰可

涂守謙名字說

黃子向自梁麓來為予言盤陀涂子交相善也其為人沈厚好學個儻有大志將來所就殆弗可量予曰然吾邑内外山村海角人物鬱蒸忠孝節廉理學經濟文章之彥所在多有獨梁麓西偏無象盤陀二十里許自唐

宋迄今少槩見焉山川之湮鬱既久靈秀日開固當有
人出也頃之子向介涂子於予予得交甚喜出自意外
涂子原名邁倫以童試不利更名學詩又不利屬子向
請予更之予曰名者父母所命不可更也邁倫善哉丈
夫生當世上不可無出類拔萃之思吾立心制行事事
求為聖賢則聖賢為豪傑則豪傑馳心於聲色汨沒於
勢利卑陋齷齪俛首蓬蒿自安於愚不肖則愚不肖而
已矣志所存則氣赴之故學莫先於立志立志既高發

奮自易振拔流俗超邁羣倫在一鄉高乎一鄉在一國
高乎一國固其所也最愛一武人語云我輩即為人奴
亦應作羣奴長此言雖粗可以喻精學者常存此等意
趣砥礪激昂隨在皆可出人頭地予顧涂子顧名思義
仍名邁倫無疑也是時邑大尹汪公月課多士遂以涂
邁倫冠童子軍予戲謂子向曰涂子今果邁倫矣曩之
不利於試者固知名不任咎也子向復請為涂子字予
固謝不敏既而曰涂子既名邁倫則有不可一世之槩

懼其尊已傲物也道在守之以謙易曰謙尊而光卑而不可踰每見世人小有才華輒驕盈夸誕陵尊長侮朋儕無論輕薄淺陋非有成之器即其面目可憎不啻拒人千里外此學者之大患也故立志必以聖賢豪傑自期而待人接物常凜乎有匹夫勝予之懼所謂位置愈高而檢身若不及謙謙君子真能出人頭地者乎欲為邁倫字莫如守謙宜子向以為然屬予筆之予既喜子向之能擇交又自幸得交涂子知涂子之立志矯然不

隨流俗波靡將為盤陀山川開湮鬱焉故樂為之說抑
予聞涂子大父江伯公為吾邑名薦紳尊人長源先生
烟霞高寄而好善樂道庭訓有方涂子當以信友者順
親以繩祖武者養父志庶幾無愧乃翁命名之義予與
子向亦有榮施焉涂子勗哉

程子篤字說

乙巳中秋余在太學助教程枳軒先生語余曰小孫名
傳曾應童子試矣其為我賜之字且書數言勗之余曰

嘻善哉斯名也其旨深其義大其望子以聖賢有振刷
流俗之意乎聖門之道惟曾子獨得其傳越千數百年
而河南程氏夫子慨然以興起斯文為已任今君也程
其姓而以傳曾為名可不顧斯名而思厥義哉凡人之
生皆可以造於聖賢卑靡小夫以科名富貴為止境聞
言道而怪聞學聖賢而舌撝不能收若而人者余何暇
與之言耶曾子之學誠篤而已聖門學者聰明才辯不
為不多而傳其道者曾子此程子之言也程子又曰顏

子默識曾子篤實得聖人之道者二子也又曰欲當大任須是篤實蓋淺露輕浮非有成之器虛僞夸詐非大受之才余今字君曰子篤君無以余言為迂篤之字義訓厚而力君立心制行待人接物之間務皆從厚凡所當為之事必認真着力為之徹始徹終登其峯而造其極無使留餘憾焉則他日之學問文章經濟事業可預知其遠且大而為子篤孝為臣篤忠為兄弟篤友恭交遊篤信義遇民篤仁物篤愛實心實力無虛假而無間

斷雖聖賢無以加矣夫忠孝信義仁民愛物皆道也造其極則為聖賢留其憾則為不肖冥然無覺悍然不顧則獸與禽學者不敢為聖賢必將自安不肖流于禽獸而後止嗚呼可不懼與余語君以聖賢之學或必以為迂且怪不知聖賢之道即在人倫日用之間夫何迂何怪之有而曾子所以為聖賢不過篤實二字學曾子曰我不能學篤實亦曰我不能乎自欺欺人飾名務外以奸巧為作用以刻薄為聰明近今學者之通病也夫惟

賢哲不逐波流願子篤無負而公命名之意則吾說未必無小補云

陰子儒字說

酉春放廢待罪棉江鶴石老友自翠華千里專倅馳書慰唁且以其次孫延宗屬余字之余曰噫宗之義不一古之以宗聞者亦衆不知鶴石所取者何居也徒綿衍宗支為朝廷增戶口此無能之士備人數耳謝超宗稱鳳毛則詞藻之末也范蔚宗有史才作後漢書至今不

朽然亦不過文史之傳非吾所望於陰子五鹿充宗講
經獄獄為漢名儒渠雖未聞聖人之道亦能學聖人之
學者鶴石所以名孫不知或取諸此與否但宗之一字
每為異教所剽竊命名之義不可不清余觀晉室習尚
虛浮猶稱賀循為世儒宗則宗必以儒為正而鶴石所
望於乃孫之延之者意在斯乎雖然循不足道也晉安
得有儒循亦未足以宗也先王之道具在六經坐而言
起而行日用倫常終身由之而不盡讀書不講求實學

當躬踐履汨沒于清談誕放與沾沾八股制義科名得失之間其荒陋不甚相遠也公然命之曰儒可乎儒者之學有體有用自身心性命之地推而行諸家國天下而準可久可大可以紹往聖藏名山而開來學如此之人乃足當儒宗而不愧余願宗之為君子儒也字延宗曰子儒宗其顧而思厥義焉正學昌明大儒輩出若宋之濂洛關閩則宗孔孟元之許魯齋明之薛敬軒胡敬齋羅整菴則宗濂洛關閩此皆君子儒也不宗程朱則

為異學金谿姚江白沙之徒皆以陽儒陰墨見譏有道
況彼浮屠邪說所謂五宗尤離經畔道不容於堯舜之
世者余將火其書廬其居肯聽後生小子墜入其阱中
而不悟耶學者宗濂洛關閩則不為異端邪說所搖惑
而孔孟之門牆可進余願子儒之識所依歸無負乃祖
命名之意不知鶴石以余言為然否也

族子曰仁字說

曰仁字近哉求仁當自近始也孔子曰仁遠乎哉我欲

仁斯仁至矣孟子曰仁人心也可知仁非外鑠當前求之即是世俗因聖門不輕許仁雖顏氏子亦僅三月不違遂疑仁為古今絕德高遠不可能之事無怪乎天下之不仁者多而一二不昧天良若景星鳳凰之不數見也夫仁之為道廣大悉備而切近精實造乎其極而安而純之雖大賢有所不能盡隨其所見而存而體之即中材亦擴充而不竭是何也無惻隱之心非人也人敢曰吾獨無惻隱之心乎孝弟即為仁之本人敢曰吾獨

為不孝不弟乎近哉年少力強正當以仁為己任不可
汨沒世情而甘自暴棄孩提知愛稍長知敬實用其力
於事親從兄之間推之而忠君愛國推之而濟人利物
满腔舉惻隱之心而仁溥於天下矣顏淵問仁夫子告
以克復仲弓問仁夫子告以敬恕克復敬恕不在外求
皆近也莫近於視聽言動而非禮者勿之則為仁莫近
於持已及物而如見如承不欲勿施則為仁天下無明
知非禮而故犯之學者無立意驕慢而陵人之學者於

此求之其庶乎抑夫子有言剛毅木訥近仁非剛不足以任道非毅不能以致遠非木則病於浮華非訥則流於誇誕近哉養成剛德遂兼四者此亦天生一近仁之質也近哉勗諸

長兒雲錦字說

長兒雲錦冠而字命之曰倬文中庸引詩言衣錦尚絅惡其文之著然則字錦者宜有取于絅而余獨命之以文何哉蓋實有是錦之美於胸中則宜韜宜斂使

無即於淺露而中未嘗有是美則又當濟之以所無守
先聖博學於文之訓反求之六經陶淑乎禮樂而後有
章美內含之具錦少不嗜書好走馬擊劍彎弓習礮以
為樂余惡之長而從軍海外逐北獻俘浪擲居諸戎伍
間歸始皇然自愧欲一肆力於學復奔走弗遑兼驚為
詩歌喜古金石泛濫琴書玩物喪志於道茫未有得焉
若又命之絅與闇是益其疎且陋也昔張橫渠好談兵
范文正勸讀中庸卒成大儒兵武事也不可不以文藥

之倬之義何居則取乎其大耳文之大者在天為日月
星辰在地為山川草木而在人為綱常名教臣忠子孝
兄友弟恭立身行己待人接物莫不燦然秩然有法有
則所謂道之顯者謂之文非浮夸粉飾欺人媚世之謂
也勝質之文不可為文風雲月露雕繪詞章之文詹詹
渺渺亦非吾所謂文也錦其歸而求之六經淑乎禮樂
自日用飲食灑掃應對進退之地居敬以收放心讀書
窮理以擴充其知識致力於修身齊家之要而講求乎

經世理人有體有用之學篤實輝光日新月益斯可謂
天下之至文矣華國者以此章身者以此倬雲漢而章
天煌煌乎弗可量也雲錦勉乎哉

次兒雲龍字說

雲龍字虞颺或曰大皞軒轅雲龍紀官孔子之學於郊
者可述也抑孔子稱老子猶龍而東漢荀氏有八龍管
邴三人為一龍諸葛公為卧龍龍之可學者多矣而獨
虞也耶曰居吾語汝上古之世荒邈難稽儒者讀書尚

論斷自唐虞始老子猶龍之說不見於經未敢信且釋
老異學將擯斥之不遑豈可復求其祖而師之荀氏諸
子雖有八龍之稱予觀其學問人品未有衷於道者東
京習尚好相標榜君子不貴也管邴三人為一龍而華
歆狗彘廁其間則名士風流掃地矣南陽卧龍乃真名
士迄今讀澹泊明志寧靜致遠數言猶將中夜以興再
拜而私淑之但其遭時匪盛弘濟艱難則非堯舜之民
所願比擬者也今

天子神聖遠紹勳華百僚師師婉休皋益當茲草茅誦
讀惟夔龍足慕耳我思龍之際虞賡颺盛美為帝喉舌
遭逢之盛千載無比雲龍幸生聖世得為堯舜之民不
學斯人愚之下矣夷考龍生平事史冊不多見意其人
必善自韜斂不矜才好名類乎斷斷無技者堯舜所
用之人既非無才者比況乎秩宗之讓優於禮樂又為
同列所共推則其沈深厚重之槩可師也讒說殄行震
驚朕師此何如之重任則其剛方正直之氣足以鎮壓

奸回之邪心又可師也納言之命曰夙夜出納朕命惟允夫允信也即誠也龍之必誠必信不在出納帝命之日而在平居伏處之時學者有志賡颺為夔龍之接武其必自立誠始乎誠存則日用動靜之間一言一行無有不實而浮華標榜之弊不覺自消異端曲學不足以搖惑心志居敬弗怠涵養日深讀書窮理知識日明講求有體有用之實學無使賡颺虛處士之聲則所以為盛世夔龍者在此矣無媿虞颺之字惟雲龍之勉之不

然而德之不修學之不講悠悠忽忽坐廢居諸將學龍不成不為虞之颺蚓竅蠅聲貽羞大雅猶畫虎不成而類狗也可不懼哉

三兒雲翔字說

字雲翔曰仞千取鳳皇翔於千仞之義也世途險阻矰繳孔多非特枳棘不可以悞棲安知梧桐之下不有挾彈攝丸之子自古及今殊尤見嫉雖上聖大賢且不能免況末學之戔戔者乎惟有高飛遠舉足以全身遠

害君子於是有知幾之學而余方自悔其前此之昧之也三子雲翔質最魯才最庸無足為時所妬嫉賦性高寡有入山惟恐不深入林惟恐不密之意向固非余心所喜者公忠獲戾後始器此子之不汲汲於榮名與世人無爭患也將遂使高蹈烟霞勤四體分五穀鑿山為田堰澗為池嘯歌自得於清泉白石之間與巢父被衣相上下庶幾古人所謂名可聞而身不可近德可仰而形不可覩者鳳皇于飛凌霄絕漢雖有矰繳將安所施

可為翔也信之矣虎豹在深山人人聞聲而惶恐以之
遊五都之市則販夫孺子皆持瓦礫而逐之是以麟出
大野足折鉏耨龍入魚羣豫且見困英雄失路今古同
悲孰與夫鳳兮鳳兮獨往獨來於千仞之上併梧桐亦
不棲竹實亦不食確乎有以自全不致貽德衰之誚哉
閱歷日深識見日益倘樊籠之可脫即奮飛以為期余
將振翮入山求所謂千仞者而居之自耕隴上而妻子
耘於前則翔也為克家之肖云

四兒雲翼字說

莊生言大鵬不知幾千里其翼若垂天之雲嘻大矣凡物不徒貴其大以大有用者為貴翼而飛則有用之用也大展其能於青漢之間依日月躡風霆數千里山川民物皆在肘腋覆庇下其為用也大矣四兒雲翼自孩提即高自位置稍長顧其名詡詡然自以為大也余欲其勉為有用字之曰展青青者何霄漢間氣象也與溟海迴別則位置獨高展之為義有積厚發弘之意焉

志立而氣赴神動而天隨非胸中大有蘊蓄腕下大有
設施者詎足以與於此顧余聞儒生常談有長莫展迨
當可展之時履得展之地靡不臨局倉皇繭然沮喪是
何也抱負無多艱技易窮舉之莫能勝也行之莫能至
也此亦如鸞鳩決起展在榆枋鳥足與言青青之上展
運大翼者哉其平居不動聲色匪潛匪伏養融思奮幸
際天清日朗鼓壯氣以騰霄直上九萬里橫飛九萬里
東西南朔皆我適意之地天下共仰展布之非常莫能

測其精神力量之所屆斯鵬之為大所以異於凡鳥而君子之善其用者亦若是焉則已矣立體以致用積厚而發弘雲翼勉乎哉

五兒雲鶚字說

北海有言鶚鳥累百不如一鶚以鶚性方嚴好搏擊為羣鳥所畏又鶚而有別立不妄動古人以比御史大夫立朝凜凜風裁焉余獨喜其善峙有卓然自立強毅不移之槩可為後生小子求道入德之方字雲鶚曰立甫

取此意也吾夫子十五志學至三十而後立又曰可與
共學未可與適道可與適道未可與立若是乎立之難
也蓋篤志固執不為事物所搖非知之明而守之定其
孰能與於此故學莫先於立志以聖賢為必可為不以
游移委靡蹈庸愚不肖之轍以千駟弗視萬鍾弗屑為
立品真實無妄忠信不欺為立誠卑污苟且私偽牽引
之譏吾知免夫自古及今未有悠悠忽忽而克有成者
能立則日進高明以幾聖賢非難事不能立則日淪頹

靡至違禽獸無幾希於戲可不懼哉抑立之為義兼有樹立之意焉道德功業可傳於世者是也世風日下士子以科名為樹立茫不知聖賢事業為何等居官以尊顯為樹立者不識堯舜君民為何事皆未聞道之故也天下王侯將相當時則榮沒則已焉烏可以言樹立若叔孫氏所謂立德立功立言斯可傳之千秋百世而不朽者乎是以君子不論窮達常志在此三者出則立功處則立言立德無間於出處立言亦功在萬世有一於

此足以屹立千仞為世道人心之柱石況其兼修而並致豈不為聖人之徒歟鸛其夙夜黽勉克思所以立哉
六兒雲燦字說

今上聖德光昭卿雲疊見郁郁紛紛蟠成異采緬想虞廷爛縵百工相和而歌光華復旦亘古獨盛自非堯舜之民何能身親見之今茲所覩乃與符合幸得瞻被祥輝分映麗藻於光天化日之下可謂千載一時燦之生也會逢其適則亦今之堯舜之民也字雲燦曰舜民燦

其顧思厥義無輕視此民乎均是民而獨為堯舜之民則必立心制行無背勳華風動時雍先為表率有一事一言不可以對堯舜則非矣顧民之等不一爍當勉為其上者天之生此民也有後知後覺則有天民之先覺君子以其身全盡天理為天之民則當思上天所以生民生我之意是故得時而駕則能致其君為堯舜之君使其民為堯舜之民即所遇或窮而躬耕畎畝亦能抱堯舜之道樂堯舜之樂而非道非義之一介不輕取與

千駟萬鍾弗屑顧視養其志以有為而後可以當天
之大任而不懼孟子所謂達可行於天下而後行之者
此民也孔子所謂隱居以求其志行義以達其道者亦
此民也其次則不能自立待上之鼓舞教化而後興凡
民也雖不可語於豪傑之士亦庶幾不自暴棄者又其
次則不識不知耕田而食鑿井而飲併帝力而亦忘之
蚩蚩噩噩之民余不能為燦也數矣若言非禮義而行
涉浮華立志不敢以聖賢自期舉動偏欲與庸衆為伍

此則聖世之苗頑具違禽獸也不遠舜不願以之為民也燦也思無愧舜民之字當先思堯舜所望于民之心為臣則忠為子則孝為夫婦敦禮法兄弟篤友恭知交全信義立心制行事事可以對勳華之主協風動時雍之化併以其身為四民之首而躬行表率不遺餘力使百姓親五品遜今之堯舜從欲以治亦曰此國家之天民矣夔龍元愷固堯舜之民也伊萊望散亦堯舜之民也惟其道在焉而已雲燦勗諸

從子雲樞字說

雲樞字德辰樞本北斗第一星為政以德者如之字此何居欲小子之據於德耳志道據德學者所同孔子曰德之不修學之不講聞義不能徙不善不能改是吾憂也人有生即有德五常百行聖凡皆所當修豈必論為政與不為政哉出諸於身謂之德加諸於民謂之政獨善其身兼善天下有遠近而無大小惟在學以修之而已講學以修德則道明聞義能徙不善能改則德立司

馬溫公自言去惡從善若轉戶樞似為汝小子砭也抑
大易云言行君子之樞機樞機之發榮辱之主也汝曹
謹言慎行無使有累厥德寡尤寡悔祿在其中於從政
乎何有秉鈞軸佐太平固為政也一官一邑亦政也政
行而人嚮慕之窮居修德而不孤有鄰皆北辰星共之
義也小子勗哉

從子雲路字說

雲路字汝由孟子曰夫義路也惟君子能由是路又曰

舍其路而弗由哀哉以是知義為天下古今所當行之
理在由之為貴耳世人弗由路而由徑舍光明正大之
周行而趨邪暗屈曲之蹊間或枉尋直尺苟且以倖功
名或汨沒異端以索隱行怪為學問吾不願汝由之也
又有不由徑而由竇阿權勢媚要津以患得患失之心
希一階半級之榮昏夜乞哀驕人白日栩栩然竇中之
智未必不笑竇外之愚吾不願汝由之也君子以仁為
宅以禮為門而以義為路坦坦康莊如砥如矢何羨他

人之徑與實為耶澹臺滅明行不由徑高子臯避難而
行不徑不實彼謹小以慎微懼毫釐以千里是故畢生
無邪曲之累循途漸進幾造聖賢之域後生小子安可
不則倣之且古未有行不由路者馮河超海立見滅頂
之凶適燕而南其轅勢將愈求而愈遠惟君子由所當
由如規矩準繩之不可易由所不得不由如日用飲食
之不可離是何也曰宜也宜在斯為義義在斯無不宜
為臣宜忠為子宜孝皆義也皆人所當由之路也凡言


不忠信凡行不篤敬皆自投荆棘陷阱之中無所往而
可矣或曰雲路鵬程科名美事命字者宜有取於此吾
獨以為不然讀書本期用世豈不願以科名望汝惟恐
汝曹以科名自域視為登峰造極之品詣不復求進於
聖賢之道耳科名得失有天者存即得之而不足齒於
人數者多矣聖賢之道不以窮達加損得志與民由之
不得志與千秋百世共由之斯天下之正路非區區功
名富貴之途所得較遠近廣狹也汝由勉之

從子雲鳳字說

雲鳳字藹臣勛鳳也鳳棲梧桐食琅玕美矣棲與食世人知之而不飛不鳴則德有所不足也卷阿之詩曰鳳凰于飛翾翾其羽蓋有道來儀天下大安寧之象是以言之不已而重言之繼之曰藹藹王多吉士維君子使媚于天子又曰藹藹王多吉人維君子命媚于庶人媚愛也悅也非諂也藹吉良臣維上命使明良會合拔茅彙征之象也媚于天子則愛君媚于庶人則愛民竭忠

蓋以報國家賢者惟知有君民耳高岡一鳴朝陽羣
車庶馬閑翹翹徵聘原非以榮臣子之身家將使第祿
康純嘏常泮奐優游千百年如一日也嗟乎世人但能
務居棲美飲食耳既飽既安則斂翼緘口雖鞭策之不
能動其巧焉者媚于權勢而已矣受重祿而弗知其君
處高位而弗恤其民蟠結營私牢不可破此齷齪鄙夫
之所為不可以士人目之鵠鵠鵠傳虎而翼視茲藹
藹勸相國家其臣品相去何如也鳳不喜詩書而好以

武功自謂余故以藹吉進之仕途無用媚之區惟媚庶
人以媚天子則可耳聽命使于私家附權奸之黨羽早
知鳳不屑為也溫文爾雅使天下稱愛國愛民干城腹
心之良士有功世道匪淺矣藹吉助諸



鹿洲初集卷十三